

Vizyon

SPPF i met Sesel dan Kriz

Seselwa pe viv lo petet, e tou dimoun i dan lenkyetid. Nou konnen ki byento pou annan bann lanons grav ki pou afekte nou tou. Ziska prezan nou tann bann pti bout, e deza sa ki nou tande i soka. I aprezan ki nou tou Seselwa, nou'n ganny en konpran dan ki kalite salte ki SPPF in met nou ladan. Malgre ki SPPF pe esey fer tou pou met sa blanm lo lezot dimoun, tou Seselwa i konnen ki se SPPF ki'n o-pouvwar depi 1977, e ki se zot ki'n mal anmenn nou lekonomi e met nou dan sa salte kot nou ete ozordi. Alor i pa vo lapenn ki SPPF i esey rod en bourik gran zorey pou blanmen.

3000 dimoun pou perdi louvraz

Parey bokou dimoun in kapab konpran dan bann program lo SBC, SPPF i anvi koup lakantite travayer dan gouvrenman. Dapre en sours dan Minister Finans, i annan anviron 3000 travayer ki pou perdi zot lanplwa. Sa i tris akoz se sa menm SPPF ki'n anploy en kantite dimoun zis pour rezon politik e pour zot ganny eleksyon. Parmi bann ki pou ganny targete se bann dimoun parlo 55an ek bann zenn ki fek rantr dan en lanplwa. Nou espere ki i ava annan en program byen kalkile ki ava permet sa bann dimoun pou rantr dan en nouvo lanplwa. Nou mazinnen ki mannyer demyen fwa dimoun ti zis ganny en let Vandredi apremidi e ganny pouse parey lisen.

Lasistans sosyal pou koupe

Nou ava osi rapel ki mannyer SPPF in toultan servi lasistans sosyal koman en zouti politik. Pour sak eleksyon, zot deside partaz larzan sekirite sosyal pou aste voter. La ozordi, sa menm SPPF pe al koup lasistans sosyal lo en minimom. I resanble ki en kantite program pe al ganny arete. Bokou dimoun ki dan bezwen pou trouv zot dan difikilte. La ozordi SPPF i sanz zot langaz e zot koze konmsi sete pa zot ki ti met tou sa bann dimoun lo lasistans. Lepep pe war

vre kouler SPPF atraver sa bann aksyon.

Lentere labank pou plis ki 15%

Sa menm Gouvrenman SPPF pe al donn lenstriksyon bann labank lo ki poursantaz pou sarz dimoun pour bann loan. Ozordi dimoun pe pey anviron 12%, me byento sa pou mont parlo 15%. I riske menm ariv 20%. Sa i vedir ki tou dimoun pou war li tre difisil pou pran en loan pou konstri en lakaz oubyen pou fer en lot keksoz. Sa dan limenn pou anmenn plis difikilte pour nou bann fanmiy Seselwa ki pe esey batir en pti landrwa pour zot fanmiy. Konmdir koze, 'malere pou soufer e pou konn vre kouler SPPF!'

Dolar R15

Avan eleksyon SPPF ti dir ki zanmenm zot pou devalye rroupi. Nou'n war ki mannyer se ekzakteman sa ki zot in fer apre eleksyon. Byento pou annan en lot seri devaliasyon. Dapre konpran dolar i riske ariv R15 dan labank, menm pri avek black market, e Ero pou depas R20. Dapre SPPF, sa i sel fason pou elimin black market. Me sa pou vedir ki dimoun pou napa larzan pou aste dolar. Son konsekans lo pri marsandiz pou

osi ganny resanti dan diferan fason malgre ki SPPF pa tro oule koz lo sa size.

Zafer i vremen sal menm!

Seselwa, annou konpran byen ki ozordi, anba SPPF, keksoz pe vremen al mal. Tou sa bann gran promes ki SPPF ti fer avek lepep Seselwa in fini anvole parey en lafimen. Ozordi SPPF i oule ankoler avek SNP. Malerezman se pa nou ki responsab pour sa bann desizyon ki zot in pran dan lepase. E fodre ki Seselwa i konpran ki se pa zis kriz deor ki'n fer nou kot nou ete. Si SPPF pa ti pran bann desizyon pirman politik zis pou ganny vot, me konn byen priorite nou pei, ozordi nou pa ti pou trouv nou dan sa sitiasyon. Ozordi lepep Seselwa pe ganny demande pou ser sang, me yer sete sa menm SPPF ki tya pe dir nou avek zot, nou pou mars lanbraget ouver. Seselwa, zafer pabon. Veye e nou ava trouve. I malere, me pour lafet bann sef SPPF ti anmize tousel, me letan in ariv ler pou lav kastrol parti, se lepep ki bezwen fer li. Esperon ki nou'n aprann nou leson SPPF.

SNP pa pou les li ganny servi

Lepep Seselwa in soke pou aprann atraver en kominike IMF pandan wikenn ki gouvrenman SPPF in finalman dakor pou enplimant program sa lorganizasyon. Sa i vedir en sel keksoz: **Sesel i dan gro difikilte ekonomik e SPPF in bite e pa konnen ki pou fer. Me dan tou sala, SPPF parey son labitid, pe rod pas sa lour lo en lot parti. Me SNP in dir klerman ki nou pa bann bourik gran zorey e SPPF i bezwen pran son responsabilite.**

SNP in refize zwenn avek sa delegasyon. Rezon i tre senp. In napa en sel moman dan lepase ki SPPF in santi li nesese pou IMF zwenn avek Lopoziyon, pou ekout nou pwennvi lo size lekonomi, bon gouvrenans

ek latransparans dan Sesel. Akoz en sel kou zot entere? Eski zot zis anvi ganny nou sipor pou zot program e apre dir avek dimoun SNP ki responsab?

SNP i demann lepep Seselwa pou konpran byen labitid SPPF. Letan zot dan problem, zot fer kwar zot vin koze. Zot zve bon boug, me anmenm tan zot rod detri ou.

Madanm Gamatis ti dir dan Lasanble ki Mr. Michel tya pe esey fer Mr. Ramkalawan bwar delo 'cool easy' State House. Son boutey i ankor plen e byen kaste. Sa i montre ou lipokrizi SPPF. Se pour sa rezon SNP i dir, 'Sa ki'n soz son soz ya soz limenn!'

Gete kote SPPF in anmenn nou pei

SPPF finalman in oblize anval zot lalang e fer ekzakteman sa ki zot ti dir zanmen zot pou fer: anval sa pilil anmer preskri par IMF. Apre 32an ki zot in opourvwar, i kler ki SPPF napa lot swa, me pou les bann mezir dir e fermal ganny enpoze lo pep Seselwa.

Dimoun ordiner ki pou soufer

Move zestyon ekonomik pandan sa bann deryen lannen in fer ki Sesel in akimil sitan det ki ozordi nou ankor dwa bokou. I kontinyelman napa ase deviz etranzer pour dimoun, e nou rezerv deviz in preski dir fini dan Labank Santral. Sel keksoz ki gouvemman i oblize fer aprejan se enn fwa pour tou pran bann mezir ki pou fer dimoun ordiner soufer. Sa i montre nou ki mannyer SPPF in zis bat nou latet. I pa akseptab.

Zot in evakye!

Tou dermyenman dimoun dan distrik Glacis, sirtou dan rezyon Machabee, in fer remark labsans de aktivist presn-sipal, SPPF. Avek sa presyon logmantasyon dan pri lavi ki'n anvlop tou fanmiy Seselwa, frer Prezidan pei in evakye avek son fanmiy pou al egzile Langleter.

Pourtant zot ti sa bann menm dimoun ki ti pas partou devan laport dimoun pou dir ki sistenm SPPF i bon e zot bezwen tenir e pa large. Ozordi ler zot dezapwente ek sistenm Jj, son frer i premye pou large.

I kler ki ozordi pei i dan mal. Lekel ki ti ava espekte ki son frer ti ava al rod refiz dan lafreser Langleter? Ki'n arive? Li osi in war ki son frer pa ni Kosto, Konpetan e Kapab? Annou gete lekel lot ki pou large. Letan ki pou koze.

SNP ki'n adres problemn Sesel

A plizyer repriz SNP in eksprim konsern viza-vi bann tandans negativ ki ti pe annan dan nou lekonomi e demann plis transparans dan lafason ki gouvemman i fer son travay. Se zis SNP ki'n annan kouraz pou kritik bann move desizyon ekonomik, parey lavant zil pour en rounpi, disparisyon \$4.5 milyon, pret tro bokou larzan avek bann labank komersyal lokalman, labi dan sistenm 'welfare' e gaspiyaz dan bann sibvansyon. Si selman bann MNA SPPF ti'n annan kouraz e koz lo lapar bann dimoun ki'n elekte zot e dir kot i mal keksoz ozordi ti pou totalman diferan.

SNP i lo kote lepep

SNP i partaz konsern e lenkyetid lepep Seselwa lo ki lavenir pe anmase pour nou.

Jj i 100% responsab

Sitiasyon ekonomik ki Sesel i vwar li ladan ozordi pa en keksoz ki fek arive yer. Apre 32an ki zot in opou-vwar, SPPF i annan litousel pou blanmen pour bann desizyon ki'n met nou pei dan det, fer nou rounpi devalye, donn Sesel en move repitasyon lo marse kredi internasyonal e fer koripsyon.

James Michel in Minis Finans pou pros 20an dan ladministrasyon Mr. Albert Rene. Anba son prop prezidans pandan sa demyen 4an, nou pei in plonz pli dan fon. Avan i ti ganny elekte, i ti promet ki Sesel pa pou pran ankor okenn gro 'loan.' Me ki'n arive apre? James Michel in responsab pou pran sa pli gro 'loan' ki'n met nou dan plis difikilte!

Akoz son dezir pou ranport eleksyon a tou pri, James Michel i tanpi ki fardo i met lo

Nou demande ki Seselwa ankor enn fwa i reflesir e konpran byen ki nou pei anba SPPF i dan en gran kriz. Sanzman i inevitab e se en gouvemman SNP ki pou kapab donn Sesel sa nouvo direksyon ki i bezwen. Nou plan i enkli kreasyon en lekonomi modern, stab e ki pou fer progres. SNP i kwar dan bon planifikasyon, repeyman det a-ler e kontrol dan depans pei. Sa i bann eleman enportan ki Sesel i bezwen pour ki nasyon Seselwa i trouv sa prosperite ki i byen bezwen. SNP i debout lo kote lepep Seselwa dan sa moman tre difisil. Nou'n fatigue ganny maltrete e zot rapel ki mannyer SPPF ti dir 'Kile lopoziyon, les Jj travay!' Ozordi nou'n kile e nou espere ki dimoun i realize ki kalite travay ki Jj ti anvi fer pour zot. Annou siport SNP ek sanzman ki pou redonn nou nou pei.

Sesel. Son lobsesyon avek bann proze grandyoz parey liniversite Sesel, zwe CJSOI ek zwe de Zil 2011 i montre konman i pli enterese avek keksoz ki pou glorifye li, olye investi dan bann proze ki priyorite pour pei.

Sesel i bezwen en dirizan ki pa pou abandonn bann ki'n vot pour li atraver bann move desizyon, parey pous dimoun dan zot lan-plwa, devalye rounpi, mentenir GST menm ler i tro bokou, refize partaz larises pei e permet tou lavantaz al pour bann etranze. SNP pe demande ki Prezidan Michel i aksepte son par responsabilite pou sa moman difisil ki Sesel pe pas atraver e ki i demann leskiz pour bann move desizyon ki in pran. Seselwa i bezwen laverite pour ed li grandi e fer li ganny bann dirizan senser e onnet.

PAS PARTOU

Privilez pour serten

I gou ekout serten gran madanm SPPF ki annan privilez al fer shopping dan laboutik rezerve pour bann ki annan foreks eksplike ki mannyer i pe debat pour pov Mr. Anacoura anler Ma Joie! Eski i pa tya meyer olye zis koz pour li en zour anmenn en bon morso lavyann tann e donn sa imsyek son fanmiy? Aret bat latet sa ki feb.

Delo 'Cool Easy'

Zot rapel letan Madanm Gamatis ti'n met 'hair extension' locks? Sa ti apre ki i ti'n bwar en galon delo 'cool

easy'. Pour son lenformasyon Mr. Ramkalawan pa'n bwar sa delo, me boutey i ankor byen kaste anler State House, malgre ki lanbalaz in sanze. Petet i tya kapab dir avek Jj esey donn enpe sa delo Mr. IMF!

Letan ou frekant lisyen...

Nou bezwen dir avek Deco pou fer atansyon. I annan tro bokou lisyen otour li, tasyon i ganny pis! Son lapant i danzere! Aret 'nervez'!

1418

SNP Youth e-newsletter
'1418' :

www.snpseychelles.sc/1418.htm
'Youth for a better future'

Miting SNP - Les Mamelles

SNP i envit tou dimoun pou assiste en miting piblik Dimans le 28 Septanm aparti 3er apremidi lo Court Basketball Les Mamelles. Nou pou koz lo realite Sesel ozordi e ki soufrans ki Jj in met Seselwa ladan.

Nou Pa Pou Zanmen Les Tonbe!